

TUTÚ NÍ CADÚHA TĒ PĀBLŪ QUIHIⁿ NDAHA ÑÁYIU ÑUÚ ÉFESÚ

Té Pāblú cādūha-dé tutú quihíⁿ ndaha ñáyiū xĩndecu ichi Xítohó Jesucrístú ndécú ñuú Éfesú

¹ Yúhú té Pāblú ní tendaha ñàha Yá Ndiöxí cāháⁿ-í tnúhu Xítohó Jesucrístú núú ñáyiū, chí ducaⁿ ñí cachí Yă Ndiöxí cunduu, te vitna cādúha-í tutú-a cuendá daquixi-í ndaha nchaa nchòhó ñáyiū cùu cuendá Yă Ndiöxí xĩndecu ñuú Éfesú, te ñu-ni nchòhó cúú-ndó ñáyiū sàndáá iní ñáhá xì Xítohó Jesucrístú.

² Te xicáⁿ táhù-í núú Dütú Ndiöxí Yaá cúú Tătá-ó, ndihí núú Xítohó Jesucrístú sá ná chĩndee chítúu ñaha-gă xii-ndo, te ducaⁿ ndì nduú-gá ná cádá te ío váha cuu iní-ndó cùndecu-ndo.

Espíritú Yă Ndiöxí chĩndè ñaha-xi xii-o chi ndècu ndihí-o Xítohó Jesucrístú

³ Te cachí-ó sã ño cāhnu cuu Yá Ndiöxí Yaá cúú Tătá Xítohó Jesucrístú, te ndéé andiū quide Yá Ndiöxí nchaa sá vāha sá cúú-xi-ó cuendá sá ndécú ndihí-o Espíritú-gá, te ducaⁿ quide-gá chí ndècu ndihí-o Xítohó Jesucrístú.

⁴ Te ndéé cùtnàhá vátá ngăva-gá ñuyíú ñí cachí Yă Ndiöxí sá nchóó cùu-o ñáyiū cùu cuendá-gá, te ducaⁿ ñí cachí-gá sá cuendá Xítohó Jesucrístú cuendá sá nchóó cùu-o ñáyiū ñá túú tnàhí ná

cumání cundecu núú-gă, te ducaⁿ te vá cundècu cuéchi-o.

⁵ Te Yá Ndiöxí ío cùu iní ñáhá-gă xii-o nõu xiãⁿ ducaⁿ ñĩ cachí-gá ndéé cútnàhá vátá ngăva-gá ñuyíú sã nchóó ndùu-o déhe-gá. Te sá cuendá nchaa sá cádá Xítóhó Jesucristú sá cúú-xí-ó, xiãⁿ ducaⁿ ñĩ cachí Yă Ndiöxí, te ducaⁿ ñĩ cachí-gá chi ducaⁿ tnàhí ní sani iní-gá cunduu.

⁶ Te xiãⁿ nõu xìnj ñuhu-xi sá nchóó cächí-ó sã ïo càhnu cuu Yá Ndiöxí, chi ío cùndahú iní ñáhá-gă chíndèe ñaha-gá xii-o. Te ducaⁿ quide-gá chi ndècu ndihí-o Xítóhó Jesucristú Yaá ío cùu iní-gá.

⁷ Te Yá Ndiöxí ío cùu iní ñáhá-gă xii-o nõu xiãⁿ Xítóhó Jesucristú ní sati níñí-gă te ní xíhí-gá cuendá dacăcu nihnu ñaha-gă xii-o nõú ùhú núú ndàhú, te ducaⁿ càda cahnu iní-gá nchaa yíca cuéchi-o.

⁸ Te Yá Ndiöxí ío cùndahú iní ñáhá-gă chíndèe ñaha-gá xii-o, nàcuáa ngúndecu ndihí-o nchàa sá xìní tnùní-ó te ducaⁿ te cuu-o ñăyiu tècú tnùní.

⁹ Te Yá Ndiöxí ní dánèhé ñáhá-gă xii-o nchàa sá ndúú yùhu, nchaa sá ñĩ sani iní-gá cada-gá. Te ducaⁿ ñĩ quide-gá chi ducaⁿ ñĩ sani iní-gá cunduu.

¹⁰ Te sá ñĩ sani iní-gá cada-gá te dacuitíi sã cádá-gă ná sàá nduu, te na sàá nduu-áⁿ te mee-gă cada sá Xítóhó Jesucristú quindaha-gă nchaa sá ío andiú, ndihí nchaa sá ío ñuyíú-a.

¹¹ Te nchoo ñĩ nduu táhú-ó ñĩ nduu-o ñăyiu cùu cuendá Yă Ndiöxí chi ndècu ndihí-o Xítóhó Jesucristú. Te ducaⁿ ñĩ cuu chi ducaⁿ tnàhí ní sani iní Yă Ndiöxí cunduu. Te nchaandi túhú sá quidé-gă, quide-gá nàcuáa sàni iní méé-gă cunduu.

¹² Te ducaⁿ ñĩ cuu cuendá sá nchùhú ñăyiu díhna

nuu nĩ sándáá iní tnúhu Xítóhó Jesucrístú cáháⁿ-ndí sá ïo càhnu cuu mee Yá Ndiöxí cuendá nchaa sá vǎha quède-gá.

13 Te nchòhó tucu cútnàhá ní xíndedóho-ndo tnúhu ndáá tnúhu sá càháⁿ nàcuáa naníhí tǎhú-ó ní cuu ìⁿnuu-ndo ndìhì Xítóhó Jesucrístú chi ní sándáá iní-ndó-gǎ. Te xǎⁿ cútnùnì sá nchòhó ní nduu-ndo ñǎyiu cùu cuendá Yǎ Ndiöxí, chi ní ngúndecu ndìhì-ndo Espíritú-gá sá nĩ cachí-gá taxi-gá.

14 Te sá ndécú ndìhì-o Espíritú Yǎ Ndiöxí xǎⁿ cútnùnì sá ndáá nduu tǎhú-ó cùndecu-o ndìhì-gá ná sàá nduu nàcuaca ñaha-gá xii nchaa nchoo ñǎyiu cùu cuendá-gá, te sá dúcáⁿ càda-gá nũu xǎⁿ tàú-ó càchí-ó sǎ ïo càhnu cuu-gá.

Té Pǎblú xìcáⁿ tǎhú-dě núú Yǎ Ndiöxí cuendá cue ñǎyiu ndècu ichi-gá

15 Te yúhú nìhì-í tnúhu sá nchòhó ío váha sàndáá iní-ndó Xítóhó Jesucrístú, te nchaa ñǎyiu cùu cuendá Yǎ Ndiöxí ío cùu iní-ndó-yu.

16 Te xǎⁿ nũu ñá túú dàña ndeé-í ndàcáⁿ tǎhù-í núú-gǎ cuendá-ndó, te ío xìcáⁿ tǎhù-í

17 núú Yǎ Ndiöxí Yaá cúú Tǎtá Xítóhó Jesucrístú cuendá-ndó. Te ñiu-ni Yá Ndiöxí cúú-gǎ Yaá ío càhnu cuu. Te xìcáⁿ tǎhù-í núú Yǎ Ndiöxí sá méé-gǎ ná cádá sǎ Espíritú-gá chindee ñaha-xi xii-ndo cuendá cuu-ndo ñǎyiu tècú tnùnì, te na càda-xi sá cútnùnì iní-ndó nàcuáa sàni iní Yǎ Ndiöxí.

18 Te ducaⁿ xìcáⁿ tǎhù-í núú Yǎ Ndiöxí cuendá-ndó, cuendá sá nchòhó tecú tnùnì-ndó nàcuáa ndùu tnúhu ndee ìní ní taxi-gá ní ngúndecu ndìhì-ndo cǔtnàhá ní cáháⁿ ñáhá-gǎ xii-ndo. Te ducaⁿ cùtnùnì tucu iní-ndó sǎ ncháá sǎ nĩ cachí-gá

taxi-gá nduu táhú nchoo cuè ñáyiú cùu cuendá-gá cúú-xí mèe cuií-ni sá ìo-gá vaha.

¹⁹ Te cùtnuní tucu iní-ndó sá Yă Ndiöxí ío càhnu cuu-gá quidé-gă nchaa núú sá vaha sá cúú-xí nchòo ñáyiú sàndáá iní ñáhá xii-gá, chi quide-gá sá vă yôo tnàhí ndàcu cada sá cúú-xí-ó dàtná ní quide-gá

²⁰ ní dándótó-gă Xítóhó Jesucrìstú cùtnàhá ní xihí-gá. Te ní taxinucóo-gá Xítóhó Jesucrìstú xio cùha-gá táxi tnùní-gá.

²¹ Te Xítóhó Jesucrìstú ío-gá cùnùu-gá dácúúxí nchàa núú cuè espíritú, ndihí dácúúxí nchàa cue tée yìndaha ñáyiú, ndihí dácúúxí nchàa dava-gá cue tée cùnuy. Te cuèi vitna te cuèi ndéé núú cuaháⁿ núú vèxi ducaⁿ-ni ío cunuu-gá taxi tnùní-gá.

²² Te mee Yă Ndiöxí ní quide-gá sá Xítóhó Jesucrìstú taxi tnùní-gá nchaandi túhú sá íó, te diu-ni mee Yă Ndiöxí ní cachí-gá sá ncháá ñáyiú cùu cuendá-gá quindaha ñàha Xítóhó Jesucrìstú.

²³ Te cada iní-ó sá ncháá ñáyiú cùu cuendá Yă Ndiöxí cúú-yu yiqui cùñú Xítóhó Jesucrìstú, chi ìⁿ-ni cùú-yu ndihí-gá, te mee-gă táxi tnùní-gá nchaandi túhú sá íó.

2

Yá Ndiöxí ío cùndahú iní ñáhá-gă xii-o núu xíⁿ ní dácăcu nihnu ñaha-gă

¹ Te nchòhó cúú-ndó dàtná ñáyiú ní xihí cuendá nchaa sá cuèhé sá dúhá quide-ndo ni cuu, dico vitna cada iní-ndó sá dàtná ní ndoto-ndo chi ní nduu táhú-ndó cùndecu-ndo ndihí Yá Ndiöxí ni caa ni quíhíⁿ.

² Te ducaⁿ ñĩ xíndecu-ndo ìchi cuehé ichi duha, chi ní cánchezicúⁿ nihnu-ndo nchàa sá cuehé sá dúhá ío ñuyíú-a, te ní xóo cada-ndo nchàa nacuaa càháⁿ sácuíhná, te ñiu-ni sácuíhná-ãⁿ táxí tnùnĩ-xi nchaa dava-gá espíritú cúndìhi-xi, te ñiu-ni-xi ndècu ndìhi-xi nchaa ñáyiu ñá túú cuíní tñi tñuhu càháⁿ Yã Ndiõxí, te dàcaháⁿ ñáhá-xí xii-yu cuendá cundecu-ní-yu ichi cuehé ichi duha.

³ Te nchaa-o dùcaⁿ ní xóo cada-o dàtná quidé cue ñáyiu-áⁿ, chi ní xóo cada-o nchàa sá cuehé sá dúhá ñĩ xóo cani iní-ó, te nándi-gá nchaa sá cuehé sá dúhá ñĩ xóo cahu iní-ó ñĩ xóo cada-o, núu xíãⁿ tàú-ó sã dándòho ñaha Yá Ndiõxí xii-o ni cùu datná tàú-xi dandòho-gá nchaa ñáyiu ducaⁿ ndècu ichi cuehé ichi duha-áⁿ.

⁴ Te Yá Ndiõxí ío cùu iní ñáhá-gã xii-o nõu xíãⁿ ní cundàhú iní ñáhá-gã xii-o

⁵ cuèi cùu-o datná ñáyiu ní xíhí sá cuendá nchaa sá cuehé sá dúhá quide-o ni cuu. Te ducaⁿ ñĩ quide-gá ní cundàhú iní ñáhá-gã xii-o cuendá cundecu-o ndìhi Xítóhó Jesucristú vitna, te cuu ñnuu-o ndìhi-gá. Te sá cuendá-ni sá cundàhú iní ñáhá Yã Ndiõxí xii-o xíãⁿ ní quide-gá nàcuáa nchoo nàníhí tàhú-ó.

⁶ Te cada iní-ó sã dàtná ní quide Yá Ndiõxí cútnàhá ní dándótó-gã Xítóhó Jesucristú cútnàhá ní xíhí-gá ducaⁿ ñĩ quide ñaha-gã xii-o chi ndècu-o ndìhi-gá vitna. Te Xítóhó Jesucristú sa ndècu-gá andi nõú ndécú Yã Ndiõxí. Te cada iní-ó sã Yã Ndiõxí sa ní quide-gá sá nchóó ñĩ ngúndecu túu-o ndìhi Xítóhó Jesucristú, chi ío váha ndècu-o vitna.

⁷ Te Yá Ndiõxí quidé vãha ñaha-gã xii-o vitna cuendá sá ná sàá nduu, te ñiu-ni mee-gã cada te

cutnùní iní nchaa ñáyiú sá ïo cùu iní ñáhá-gă xii-o, te ducaⁿ ïo chìndee chitúu ñaha-gă xii-o cuendá sá ndécú ndìhi-o Xítohó Jesucristú.

⁸ Te Yá Ndiöxí ío cùndahú iní ñáhá-gă xii-ndo nõu xiãⁿ ní quide-gá sá nchòhó naníhí tãhú-ndó. Te ducaⁿ nĩ quide-gá chí ní sándáá iní-ndó-gă. Te ñá díú sã cuendá ìⁿ chiuⁿ ni quide-ndo ducaⁿ ní nàníhí tãhú-ndó, chí mee Yã Ndiöxí ní cuiní-gá sá dìcò-ni ducaⁿ nàníhí tãhú-ndó.

⁹ Te mee Yã Ndiöxí ní cachí-gá sá ñà díú cuendá ìⁿ chiuⁿ quide-o naníhí tãhú-ó, te ducaⁿ nĩ cachí-gá cuendá sá vã cádá càhnu-o mee-o.

¹⁰ Te Yá Ndiöxí ní quide ñaha-gă xii-o dàtná ìⁿ ñáyiú saa cuendá sá nĩ tnahá tnúhu-o ndìhi Xítohó Jesucristú, te ducaⁿ nĩ quide-gá cuendá sá cádá-ó mée-ni sá vãha. Te Yá Ndiöxí ducaⁿ tnàhí ní sani iní-gá cunduu sá nchóó cùu-o ñáyiú cada mee-ni sã vãha.

Xítohó Jesucristú quidé-gă ío vãha cùu iní-ó ndècu-o

¹¹ Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáyiú isràél, te ni ñà túú quide-ndo datná quidé ñáyiú-án, chí ñáyiú-án sãha-yu señá ñí^í-yu, te dàquee tíhũ-yu nchaa ñáyiú ñá túú ndècu seña ñí^í-xi.

¹² Te chí dándàcu iní nàcuáa ní xíndecu-ndo, chí dàvã-án ñà túú ní xíndecu-ndo ndìhi Xítohó Jesucristú, te ni ñà túú ní xõo cuu tnahá tnúhu-ndo ndìhi ñáyiú isràél, te ni ñà túú ní xíní tnùní-ndó nàcuáa ndùu tnúhu sá nĩ cáháⁿ ndáá Yã Ndiöxí nàcuáa cada vãha-gá ñáyiú, te ni ñà túú ní cùu-ndo

ñáyiú quindaha-gă, te ni ñà túú ní xõ níhí-ndó tñúhu ndee ìní sá cùndècu-ndo ndihì-gá.

13 Te cuèi ní cuu-ndo ñáyiú ñá túú tñàhá tñúhu ndihì Yá Ndiõxí ní cùu, dico vitna ní tnahá tñúhu-ndo ndihì-gá chi cùu ìⁿnuu-ndo ndihì Xítóhó Jesucrìstú, cuèndá sá ñí sati níñí-gă te ní xíhí-gá te xíăⁿ ducaⁿ tñàhá tñúhu-ndo ndihì Yá Ndiõxí vitna.

14 Te Xítóhó Jesucrìstú ní quide-gá sá nchóó ïo váha cuu iní-ó cùndecu-o, te ðiu-ni-gá ní quide cuèndá sá vă dáquèe tihú ñáhá ñáyiú isràél xii ñáyiú ñá túú cùu ñáyiú isràél, te ducaⁿ ìⁿ-ná cuú-yu cundecú-yu.

15 Te sá ñí xíhí Xítóhó Jesucrìstú, xíăⁿ ñá túú-gă cùnùu nchaa tñúhu sá sánú ìchi ñaha xii ñáyiú nàcuáa cadá-yu cundecú-yu ni cùu. Te ducaⁿ ñí xíhí Xítóhó Jesucrìstú cuèndá sá cuè ñáyiú isràél ndihì cue ñáyiú ñá túú cùu ñáyiú isràél ìⁿ-ná cuú-yu cundecú-yu ichi-gá, te ducaⁿ te vă dáquèe tihú tñàhá-gă-yu, te ío váha cundecu ndihì tñàhá-yu.

16 Te ducaⁿ ñí quide Xítóhó Jesucrìstú ní xíhí-gá núú cùrúxí cuèndá sá cuè ñáyiú cùu ñáyiú isràél ndihì cue ñáyiú ñá túú cùu ñáyiú isràél vă dáquèe tihú tñàhá-gă-yu. Te ducaⁿ ñí xíhí-gá cuèndá ìⁿ-ná cuú-yu tnahá tñúhu-yu ndihì Yá Ndiõxí nàcuáa cuu váha iní ñáhá-gă xii-yu.

17 Te cuèi cùu-ndo ñáyiú ñá túú tñàhí xìní ndáá cuèndá Yá Ndiõxí ní cùu, dico Xítóhó Jesucrìstú ní quixi-gá ñuyú-a ní cáháⁿ-gá tñúhu váha nàcuáa ío váha cuu iní-ndó cùndecu-ndo ndihì Yá Ndiõxí. Te ðiu-ni ducaⁿ ñí quide-gá sá cúú-xí nchaa ñáyiú sa xìní cuèndá Yá Ndiõxí, ðiu-ni ñáyiú isràél.

18 Te cuèi cùu-o ñáyiú isràél àdi ñá túú cùu-o

dico diu-ni mee Xítóhó Jesucrístú ní quide-gá sá ncháá-ó tnàhá tnúhu-o ndìhi Dútú Ndiöxí Yaá cúú Tátá-ó. Te ducaⁿ nǐ tnahá tnúhu-o ndìhi Yá Ndiöxí chi ní ngúndecu ndìhi-o Espíritú-gá.

19 Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnàhá tnúhu ndìhi Yá Ndiöxí ní cùu, dico vitna chi ñⁿ-nǎ ní cuu-ndo ndìhi nchaa dava-gá ñáyiú cùu cuendá-gá chi cùu-ndo déhe-gá.

20 Te cada iní-ó sǎ cuè téé ní táuchíúⁿ Xítóhó Jesucrístú cáháⁿ tnúhu-gá, ndìhi cue téé ní xóo cáháⁿ tnúhu Yá Ndiöxí ndéé sanaha cùu-güedé dàtná cimientú ñⁿ vehe, te nchòhó cúú-ndó dàtná ndóho sá sàá vehe-áⁿ, te cada tucu iní-ó sǎ Xítóhó Jesucrístú cúú-gǎ ñⁿ yúú cúnùu cuu cimientú vehe-áⁿ.

21 Te ducaⁿ ïo váha cùu ñⁿnuu nchaa ndóho-áⁿ ndìhi yúú cúnùu-áⁿ, te ducaⁿ tucu ío váha ta quée tnàha nchaa ndóho-áⁿ cuǎsaá. Te xǎⁿ cada iní-ó sǎ cúú-xí vehe Yá Ndiöxí, vehe sá ïo ní cuu íí. Te ducaⁿ sǎtnahá-xi cùu nchaa ñáyiú ndècu ichi Xítóhó Jesucrístú chi ní tnahá tnúhu-yu ndìhi-gá, te ñⁿ nduu ñⁿ nduu ta cùu vii cuu váha-gá-yu núú Yǎ Ndiöxí cuáháⁿ.

22 Te tnàhá nchòhó ducaⁿ sǎtnahá-xi cùu-ndo chi ní ngúndecu ndìhi-ndo Xítóhó Jesucrístú, te ducaⁿ ta cùu vii cuu váha tucu-ndo nǎú Yǎ Ndiöxí cuáháⁿ, te cùu-ndo datná vehe Yá Ndiöxí chi ndècu ndìhi-ndo Espíritú-gá.

3

Té Pǎblú yǐhí ñǎquí-dě cáháⁿ-dé tnúhu Xítóhó Jesucrístú núú ñáyiú ñá túú cùu ñáyiú isràél

1 Te yúhú té Pǎblú yǐhí-í vecaá sá cuendá sá càháⁿ-í tnúhu Xítóhó Jesucrístú núú nchòhó ñáyiú

ñá túú cùu ñáyiú isràél, núu xíãⁿ ðiu cuendá-gá duha yìhi-í vecaá vitna.

² Te nchòhó sa nàha-ndo sá Yă Ndiõxí ní cundàhú iní ñáhá-gă xii-í, te ní cachí-gá sá yǔhú quihí ðiquí-í cáháⁿ-í tnúhu Xítohó Jesucristú núú-ndó, te cuendá sá cáháⁿ-í tnúhu-gá núú-ndó te cuu-xi sá vâha sá cúú-xí-ndó.

³ Te yúhú sa ní cachí tnúhu-í xii-ndo lùha nacuáa ndùu tnúhu ndùu yuhu ni cuu, sá ñí cachí tnúhu Yá Ndiõxí xii-í.

⁴ Te òrè dâcuaha-ndo tnúhu ndùu yuhu-áⁿ ní cùu te quiní-ndó sã yǔhú tècú tnùnì-í nâcuáa ndùu tnúhu-áⁿ, te tnúhu-áⁿ cáháⁿ-xi cuendá Xítohó Jesucristú.

⁵ Te tnúhu-áⁿ cúú-xí tnũhu sá vã yõ tnàhí xìnì ní cùu, dico cue tée ní táuchíúⁿ Xítohó Jesucristú cáháⁿ tnúhu-gá, ndihí cue tée cáháⁿ nâcuáa dâcahu iní ñáhá Yă Ndiõxí ní níhí-güedě tnúhu ndùu yuhu-áⁿ, chí Espiritú Yă Ndiõxí ní xáhaⁿ-xi xì-güedě.

⁶ Te duha cáháⁿ tnúhu ndùu yuhu-áⁿ ní cùu: “Cuèi ñáyiú ñá túú cùu ñáyiú isràél te cuèi ñáyiú cùu ñáyiú isràél dico ìⁿ-ni ndùu táhũ-yu sá vâha núú Yă Ndiõxí, te núu na quíndáá iní-yu tnúhu sá cáháⁿ nâcuáa naníhí tàhú-yu, te ìⁿ-nã cúũ-yu cundecú-yu, te ducaⁿ ìⁿ-ni cada vâha ñaha Yă Ndiõxí xií-yu te núu na cùndecu ndihí-yu Xítohó Jesucristú”, duha ndùu tnúhu ndùu yuhu-áⁿ ní cùu.

⁷ Te Yá Ndiõxí ní cundàhú iní ñáhá-gă xii-í ní taxi-gá chiúⁿ quide-í cáháⁿ-í tnúhu-gá, te mee-gă quidé-gă sá yǔhú ndacu-í cáháⁿ-í tnúhu-gá.

⁸ Te nchaa ñáyiú cùu cuendá Yă Ndiõxí cúũ-yu ñáyiú ío-gá cúnùu cadá-yu chiúⁿ-gá dâcúúxí yǔhú,

te cuëi ducaⁿ dico Yá Ndiöxí ní cundàhú iní ñáhá-gă xii-í ní taxi-gá chiuⁿ quide-í cãháⁿ-í tnúhu-gá núú cuè ñáyiu ñã túú cùu ñáyiu isràél. Te tnúhu-gá-án cãháⁿ-xi sá sũúní ïo váha cada ñaha Xítóhó Jesucristú xii-o.

⁹ Te ducaⁿ ñi cachí Yã Ndiöxí sá cãháⁿ-í tnúhu-gá cuendá danèhé-í nchaa ñáyiu. Te sá dánèhé-í-yu-án cúú-xí tnúhu ndùu yuhu sá ñi sani iní-gá ndéé sanaha nàcuáa cada váha-gá cue ñáyiu. Te ndéé dàvá-án ñi quesaha ndùu yuhu tnúhu-án ní cùu. Te ñi-ni-gá cúú-gă Yaá ní cadúha nchaandi túhú sá ïó.

¹⁰ Te ducaⁿ ndùu yuhu tnúhu-án ní cùu cuendá sá ncháá espíritú cúnùu ndecu andiùu quini-xi vitna nàcuáa quide nchaa ñáyiu ní tuha ñaha xii Yá Ndiöxí cuendá ducaⁿ cùtnuní iní-xi sá ïo váha cùtnuní iní-gá nàcuáa cada-gá.

¹¹ Te Yá Ndiöxí ní sani iní-gá ndéé sanaha nàcuáa ní cuini-gá cada Xítóhó Jesucristú, te ní sáá nduu ñi quide Xítóhó Jesucristú nàcuáa ní cuini Yã Ndiöxí cada-gá.

¹² Te vitna cùyii-o cáháⁿ ndihi-o Yã Ndiöxí cuendá sá ndécú ndihi-o Xítóhó Jesucristú, te sàndáá iní-ó-gă.

¹³ Te núu xiãⁿ cãháⁿ-í dóho-ndo sã cuëi duha ndòho-í vitna dico vá ná túhú iní-ndó cànchicúⁿ ñi-hnu-ndo ìchi Xítóhó Jesucristú. Te sá dúhá ndòho-í te cùu-xi sá váha sá cúú-xí-ndó, chi cuu-ndo ñáyiu cùu cahnu núú Yã Ndiöxí.

Xítóhó Jesucristú ïo cùu iní ñáhá-gă xii-o

¹⁴ Te sá cuendá nchaa sá ñi sani iní Dútú Ndiöxí quidé-gă xiãⁿ yúhú ngüñí xiti-í núú-gă

càháⁿ ndìhì-í-gá, te òu-ni-gá cúú Yàá cúú Tǎtá Xìtohó Jesucristú.

15 Te mee Yǎ Ndiöxí ní cachí-gá sá ncháá espíritú ndécú àndiù cunduu-xi datná ní cachí méé-gǎ cunduu-xi. Te ní cachí tucu-gá sá nchóó cùu-o ñáyiù, te cunduu-o dàtná cuìní méé-gǎ cunduu-o.

16 Te xìcáⁿ táhù-í núú Dütú Ndiöxí sá Espíritú-gá ná cádá nàcuáa cuita níhí ndéé-gǎ-ndó quǐhíⁿ cundecu-ndo ìchi-gá, te ducaⁿ xìcáⁿ táhù-í núú-gǎ cada Espíritú-gá chí ìo càhnu cuu-gá.

17 Te xìcáⁿ táhù tucu-í núú Yǎ Ndiöxí sá Xìtohó Jesucristú ná cùndecu ndìhì ñaha-ni-gá xii-ndo chí sàndáá iní-ndó-gǎ, te ducaⁿ te vá dáñá ndéé-ndó ìo cuu iní tnáhá-ndó.

18 Te xìcáⁿ táhù tucu-í núú Yǎ Ndiöxí cuendá-ndó ndìhì cuendá dava-gá ñáyiù cùu cuendá-gá, cuendá sá cútnùní iní-ndó sǎ súúní cùu iní ñáhá Xìtohó Jesucristú xii-o.

19 Te duha xìcáⁿ táhù-í núú Yǎ Ndiöxí chí cuìní-í sá ncháá-ndó tècú tnùní-ndó sǎ ìo cùu iní ñáhá Xìtohó Jesucristú xii-o cuèi vá ndácú càva-o quíní-ó nàcuáa cùu iní ñáhá-gǎ xii-o. Te xìcáⁿ táhù tucu-í núú Yǎ Ndiöxí sá ìo na cùndecu ndìhì ñaha-gá xii-ndo, te ducaⁿ càchicúⁿ nihnu-ndo càda-ndo nchaa nacuáa quide mee-gá.

20 Te Yá Ndiöxí ìo-gá vài sá ndácú-gǎ táxí-gǎ dàcúúxí sǎ xìcáⁿ-ó nǔú-gǎ, te cuèi ndéé nchaa sá ñà túú sàni iní-ó ñíhí-ó te tàxi-gá, te ducaⁿ chí mee-gǎ ndécú ndìhì ñaha-gá xii-o, te ndàcu-gá quidé-gǎ nándì sá vǎha sá cúú-xí-ó.

21 Te vitna nchaa nchoo ñáyiù ndècu ichi Xìtohó Jesucristú chí ná càchí-ó sǎ ìo càhnu cuu Yá Ndiöxí, te ducaⁿ-ni càháⁿ-ó sǎ ìo càhnu cuu-gá ni caa ni

quíhíⁿ chi ndècu ndìhi-o Xítóhó Jesucrìstú. Te ducaⁿ na cùnduu.

4

Espíritú Yă Ndiõxí quidé-xí cùu ìⁿnuu-o ndecu-o

¹ Te yúhú té Păblú yíhì-í vecaá sá cuëndá Xítóhó Jesucrìstú, te càháⁿ ndàhú-í núú-ndó sã cádá văha-ndo cùndecu-ndo datná tàú-xi cada cue ñáyiu ní cáháⁿ Yă Ndiõxí cundecu ndìhi-gá. Te nchòhó tnàhá-ndó cùu-ndo ñáyiu ní cáháⁿ ñáhá Yă Ndiõxí cundecu ndìhi-gá.

² Te vá cádá càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó năcuáa ducaⁿ cùndee iní-ndó nũu ná cúú sá cùmăní núú tnáhá-ndó.

³ Te ío nducu ndèe-ndo cuu ìⁿnuu-ndo cundecu-ndo, chi Espíritú Yă Ndiõxí chindee ñàha-xi xii-ndo, te ducaⁿ ío váha cuu iní-ndó cùndecu-ndo chi cùu ìⁿnuu-ndo.

⁴ Te nchoo ñăyiu ndècu ichi Xítóhó Jesucrìstú ìⁿ-ni cùu-o, te ducaⁿ ìⁿ-ni Espíritú Yă Ndiõxí ndécú, te diu-ni ducaⁿ ìⁿ-ni tnúhu ndee iní ní ngúndecu ndìhi-o cǔtnáhá ní cáháⁿ ñáhá Yă Ndiõxí xii-o.

⁵ Te ìⁿ-ni Xítóhó Jesucrìstú ndécú tàxi tnuní ñáhá-gă xii-o, te ìⁿ-ni cùu-o sandáá iní-ó tnúhu-gá, te ìⁿ-ni nĩ sandute-o.

⁶ Te ìⁿ-ni Dútú Ndiõxí cúú Yàá cúú Tătá-ó nchàa-o, te diu-gá cúnũu-gá yíndàha ñaha-gá xii-o nchàa-o. Te Yă Ndiõxí dácàháⁿ-gá iní-ó quide-o chiuⁿ-gá, te ducaⁿ ndècu ndìhi ñaha-gá xii-o nchàa-o.

⁷ Te nchoo ndì dǐíⁿ ndì dǐíⁿ chindee ñaha Yă Ndiõxí xii-o quide-o nacuáa ndùu chiuⁿ ní cachí Xítóhó Jesucrìstú cada-o.

8 Te quèe ndáá-xi nàcuáa càháⁿ-xi núú tütú Yă Ndiöxí núú càchí-xi:

Xítóhó Jesucrístú cuánda-gá andiu te ío cùnuu-gá,
chi ncha cue espíritú cúú ũhú iní ñáhá xii-gá ñá
túú ní ndàcu-xi naá ndihí ñaha-xi xii-gá,
te mee-gă ní cachí-gá nàcuáa ndùu chiuⁿ nduu táhú
iⁿ iⁿ ñáyiu cadá-yu.

Duha càchí-xi núú tütú-gá.

9 Te sá dúcáⁿ càháⁿ-xi sá cuánda-gá andiu xiáⁿ
cútnùní iní-ó sã ní cuuⁿ-gá ñuyíú-a.

10 Te Xítóhó Jesucrístú ní cuuⁿ-gá ñuyíú-a, te
diu-ni-gá cuánda-gá andiu cuendá ío cunu-gă
taxi tnùní-gá nchaandi túhú sá ío.

11 Te ní dácãñu-gá cue téee xinu cuechi núú-gă
iⁿ iⁿ núú chiⁿ cada-güedé. Te ní cachí-gá sá
dàva-güedé cáháⁿ-güedé tnúhu-gá, te dava-güedé ní
cachí-gá sá cãháⁿ-güedé nàcuáa dàcahu iní ñáhá
Yă Ndiöxí xii-güedé. Te dava-güedé ní cachí-gá sá
cúú-güedé cue téee datècú tnúhu cue ñáyiu nàcuáa
cadá-yu naníhí tàhú-yu. Te dava-güedé ní cachí-gá
sá cúú-güedé cue téee quindaha ñaha xii ñáyiu
dacuàha ñaha-güedé xii-yu tnúhu-gá.

12 Te ducaⁿ ñí cachí-gá cada cue téee-áⁿ cuendá
canu ichi-güedé cue ñáyiu cùu cuendá Yă Ndiöxí
cuendá ducaⁿ ñáyiu-áⁿ ñihí-yu nàcuáa cadá-yu
chiⁿ-gá, te ducaⁿ cuíta níhí ndéee-gă-yu cun-
decú-yu ichi Xítóhó Jesucrístú.

13 Te ducaⁿ ñí cachí Xítóhó Jesucrístú cun-
duu ndéee sáá nduu cùu iⁿnuu-o quindáá iní-ó
tnúhu-gá, te ducaⁿ cùu iⁿnuu-o tecú tnùní-ó nàcuáa
ndùu cuendá-gá chi diu-gá cúú-gă Déhe Yá Ndiöxí,
te cuu-o ñáyiu ío quide ndáá dàtná quidé mèe Xítóhó

Jesucristú. Te ducaⁿ te ñá túú tnàhí-gá ná cùmání-ó nùú Yá Ndiöxí.

14 Te ducaⁿ te vá cúú-gă-ó dàtná cue landú vátá cútnùní váha-gá iní-xi, te ni vă cádă-gă-ó dàtná quidé ndüte lamár, chi ndute-áⁿ òré quéné tǎchí te cuáháⁿ-xi duha cuáháⁿ-xi dăcáⁿ, te ducaⁿ chi vá quindáá-gá iní-ó tnùhu cǎháⁿ nchaa ñáyiú dândahú ñáhá xì-o, chi ñáyiú-áⁿ ïo váha xitó-yu năcuáa dândahú ñáhă-yu xii-o chi cǎchí-yu sá cǎháⁿ-yu tnúhu Yá Ndiöxí dico ñá ndáá.

15 Te nchoo ïo cuu iní tnáhá-ó, te vá dândahú tnáhá-ó, chi cǎháⁿ-ó mēe-ni sá ndáá. Te xini ñuhu-xi sá ïⁿ nduu ïⁿ nduu cuita cada ndáá-gă-ó quĩhⁿ dàtná quidé ndáá mēé-gă, te d̄iu-ni-gá cúú-gă Yá cúnùu cuu díhna tàxi tnuní ñáhá-gă xii-o.

16 Te d̄iu-ni Xítohó Jesucristú quidé ñàha-gá xii nchaa nchoo ñáyiú ndècu ichi-gá dàtná yiqui cùñú mēé-gă, chi ïⁿ yiqui cùñú ïo váha ní quée tnàha ïⁿ ïⁿ xichi, te ducaⁿ yihí túchi yiqui cùñú-ăⁿ yótnì-xi nchaa nacuáa ní quée tnàha. Te ducaⁿ sǎtnahá-xi cùu nchoo chi ïⁿ-ni cùu-o ndecu-o ichi Xítohó Jesucristú táxi tnùnì ñáhá-gă xii-o. Te núu nchoo quide-o nchaa nacuáa tàú-xi cunduu te cùu iní tnáhá-ó, te ducaⁿ ta nìhí ndéé-gă-ó cuáháⁿ ndécú-ó ìchi-gá.

Vá cádă-gă-ó dàtná ní xóo cada-o cǔtnàhá ní xĩndecu-o ichi cuehé ichi duha

17 Te vitna yúhú cǎháⁿ-í dóho-ndo quide-í núú Xítohó Jesucristú sá vă cùndècu-gá-ndó dàtná xĩndecu ñáyiú ñá túú sàndáá iní ñáhá xì Yá Ndiöxí, chi nchaa ñáyiú-áⁿ ñà túú vĕdana nàndíhi nchaa sá sání ìní-yu.

18 Te ni ñà túú vëdana cùtnuní iní-yu nàcuáa ndùu tnúhu ndáá tnúhu Yá Ndiõxí. Te ñáyiu-áⁿ ñà túú ndùu táhũ-yu cundecú-yu nàcuáa cuíní Yă Ndiõxí, chi ñá túú vëdana tècú tnùní-yu te ducaⁿ chi ío sàá iní-yu.

19 Te ñá túú tnàhí-gá ná sání iní-yu ndècú-yu ichi cuèhé ichi duha, te ío cùdí iní-yu ndècú-yu ichi díí iní, te ñá díú-ní xǎⁿ chi nándi-gá nchaa sá cuèhé sá dúhá quidé-yu ndècú-yu.

20 Dico tnúhu Xítóhó Jesucrístú sá ñí sándáá iní-ndó chi ñá túú dùcaⁿ sanu ichi ñaha-xi xii-ndo cada-ndo.

21 Te nchòhó ní cutnùní iní-ndó nàcuáa ndùu cuendá Xítóhó Jesucrístú, te dàcuaha-ndo tnúhu ndáá ñu-ni tnúhu-gá nàcuáa ndècu-ndo ichi-gá.

22 Te vitna vá cání-gă iní-ndó càda-ndo datná ní xóo cada-ndo cùtnàhá ní xíndecu-ndo ichi cuehé ichi duha, chi núu nchaa-ni sá cuèhé sá dúhá-ăⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuíta nihnu ñaha-xi xì-ndo quíhíⁿ, chi núu nchaa-ni sá cuèhé sá dúhá-ăⁿ ná cùhuⁿ-ni iní-ndó te dàtíca nuu ñaha-xi xì-ndo.

23 Te nchòhó, xìni ñuhu-xi sá vă dúcáⁿ-gă cani iní-ndó càda-ndo te tàú-ndó ndùu-ndo datná ñⁿ ñáyiu ní cacu túu saa.

24 Te nduu iní-ndó dàtná cuíní mée Yă Ndiõxí cunduu, chi nduu-xi nàcuáa càa iní mée-gă, te ducaⁿ te cuu-ndo ñáyiu ío váha cada ndáá, te cuu ndisa-ndo ñáyiu ñá túú tnàhí ná cumání cundecu núú-gă.

25 Te cuendá xǎⁿ núu càháⁿ-í dóho-ndo să nchòhó vá dácuañdehnde-gá-ndó dàtná ní xóo cada-ndo, te mee-nă sá ndáá cáháⁿ ndíhi tnàha-ndo, chi ñⁿ-ni cùu-o ndecu-o ichi Xítóhó Jesucrístú.

26 Te núu cùdéeⁿ-ndó te cada cuèndá-ndó sǎ vǎ cádá-ndó ìⁿ cuéchi sá dúcáⁿ cùdéeⁿ-ndó, te vǎ dúcáⁿ-ní cùhuⁿ iní-ndó tnǎhu sàtú iní-áⁿ.

27 Te vǎ dáñá-ndó mée-ndo dandahú ñáhá sàcúhná xii-ndo.

28 Te núu dava-ndo cùu-ndo ñadúhú te vǎ dúcáⁿ-gǎ cada-ndo, chi nducu-nǎ-ndó ìⁿ chiuⁿ váha cada-ndo nàcuáa ducaⁿ ñhí-ndó sǎ chíndèe-ndo cue ñáyiú ndàhú ñáyiú ñá túú nǎ ndécú ndìhi.

29 Te vǎ càháⁿ-gá-ndó nì ìⁿ tnúhu cuèhé, chi mee-nǎ tnúhu vii tnúhu váha càháⁿ-ndó nàcuáa ducaⁿ ngũnu ichi cue ñáyiú ndèdóho ñaha xii-ndo, te núu ducaⁿ na càda-ndo te cuu-xi sá vǎha sá cúú-xí ñáyiú ducaⁿ ndèdóho ñaha xii-ndo-áⁿ.

30 Te vǎ cádá-gǎ-ndó nì ìⁿ sá ñà túú tàú-ndó càda-ndo cuendá sá vǎ dándìhú-ndó iní Espíritú Yǎ Ndiöxí, chi ñiú Espíritú-gá ndécú ndìhi-ndo, te xíáⁿ cútnùní iní-ndó sǎ sàá nduu nàcuaca ñaha-gá xii-ndo cùndecu-ndo ndìhi-gá ni caa ni quíhíⁿ.

31 Te vǎ dásàtú-gá-ndó iní tnàha ñáyiú-ndo, te ni vǎ cùhúⁿ iní-ndó tnǎhu sàtú iní, te ni vǎ cùdéeⁿ-gǎ-ndó, te cuèi núú chítú núú tàcá vǎ càháⁿ cana-ndo cùcuèhé-ndó tnàha ñáyiú-ndo, te ni vǎ cuátnùhu-ndo tnàha ñáyiú-ndo, te ni vǎ cáni cuèhé cani duha iní-ndó cuèndá tnàha ñáyiú-ndo.

32 Te cundàhú iní tnáhá-ndó, te cada tnàha-ndo sá vǎha, te cada càhnu iní tnáhá-ndó nǎ ná cúú sǎ cúmǎní núú tnáhá-ndó dàtná ní quide Yá Ndiöxí ní quide càhnu iní-gá nchaa yíca cuéchi-ndo sǎ cuèndá Xítóhó Jesucristú.

Nàcuáa tàú-xi cundecu nchaa ñáyiú cùu déhe Yá Ndiöxí

¹ Te nchòhó cúú-ndó ñáyiú ío cùu iní ñáhá Yá Ndiöxí, te ñiú déhe-gá cúú-ndó ñúu xíáⁿ xíní ñùhu-xi canchicúⁿ nihnu-ndo càda-ndo datná quidé mèe-gá.

² Te ío cuu iní tnáhá-ndó cundecu-ndo datná cúú iní ñáhá Xìtòhó Jesucristú xii-ndo, chi ñiú-gá ní cachí-gá sá cùú-gá cuendá nchaa cuéchi-o te ní xíhí-gá, te sá dúcáⁿ ñí xíhí-gá te ní cuu-gá dàtná ìⁿ táhú sá cúú-xí Yá Ndiöxí, te ío váha ní cuu iní Yá Ndiöxí sá dúcáⁿ ñí quide-gá.

³ Te sá cuendá sá nchòhó cúú-ndó ñáyiú cùu cuendá Yá Ndiöxí ñúu xíáⁿ nchaa nchòhó cue tée vá càháⁿ ndìhi-ndo ñáyiú ñíhí te núu ñá díú ñàðíhí-ndó cùú-yu, te ducaⁿ-ni nchàa nchohó cue ñáyiú ñíhí tucu vá càháⁿ ndìhi-ndo cuè tée te núu ñá díú yì-ndo cuu-güedé, te ni vǎ cání tnàhí iní-ndó cundecu-ndo ichi díí iní, te ni vǎ xíhó-ndó ñí ìⁿ sá ndécú ndìhi tnaha ñáyiú-ndo, te ni ìⁿ nchaa xíáⁿ vá cání ìní-ndó càda-ndo, te ni vǎ cǎcú nèhe-ndo.

⁴ Te ni vǎ càháⁿ-ndó ìⁿ tnúhu sá ni vǎ cúú cùndedóho ñáyiú, te ni vǎ càháⁿ-ndó ìⁿ tnúhu cùtexínu, te ni dàva-gá nchaa tnúhu sá ñà túú vèdana nàndíhi vá càháⁿ-ndó, chi nchaa tnúhu-áⁿ ñà túú tàú-xi càháⁿ-ndó, te xìni ñùhu-xi sá vǎha-gá sá ndàcáⁿ táhú-ndó ñúú Yá Ndiöxí cuendá nchaa sá vǎha quide-gá.

⁵ Te nchòhó sa xíní ndáá-ndó sǎ ncháá cuè tée càháⁿ ndìhi ñáyiú ñíhí te ñá díú ñàðíhí-güedé cúú-yu, ndìhi cue ñáyiú ñíhí càháⁿ ndìhi cue tée te ñá díú yì-yu cùu-güedé, nchaa ñáyiú-áⁿ vǎ ndúú

tăhŭ-yu cundecú-yu núú ndécú Yă Ndiöxí ndihi Xítohó Jesucrístú táxí tnùní-gá. Te ni cuè ñáyiu xĩndecu ichi díí ìní, te ni cuè ñáyiu xìho nchaa sá ndécú ndihi tnaha ñáyiu-xi vá ndúú tăhŭ-yu cundecú-yu ndihi-gá núú ndécú-gă táxí tnùní-gá. Te tnúhu sá càchí-ó xìho-o nchaa sá ndécú ndihi tnaha ñáyiu-o, ìⁿ-ni cùu-xi ndihi tnúhu sá càchí ñáyiu quide cahnú-yu nchaa sá càchí-yu cùu ndióxí te ñá ndàá sá ndiöxí cúú-xí.

⁶ Te vá quèndáá ìní-ndó ni ìⁿ tnúhu sá ñà túú nàndíhi càháⁿ ñáyiu, chi ñáyiu-áⁿ ïo dandòho ñaha Yá Ndiöxí xíí-yu cuèndá nchaa sá cuèhé sá dúhá quidé-yu chi ñá túú sàndáá ìní ñáhă-yu xii-gá.

⁷ Núu xíăⁿ càháⁿ-í dóho-ndo să vă nihí tnáhă-ndó ndihi cue ñáyiu-áⁿ.

⁸ Te nchòhó ní cuu-ndo dàtná cue ñáyiu ní xĩndecu núú néé chi ní xĩndecu-ndo ìchi cuehé ichi duha, dico vitna ní ngũndecu-ndo ìchi Xítohó Jesucrístú, te ñá túú-gă ndécú-ndó nŭú néé dàtná ní xĩndecu-ndo ni cùu. Te vitna cada-ndo nchàa nacúáa tàú-xi cunduu chi ndècu-ndo ichi-gá.

⁹ Te sá cuèndá sá ndécú-ndó ìchi-gá nŭu xíăⁿ cúú-ndó ñáyiu váha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ni sá ndàá.

¹⁰ Te ïo váha cada cuèndá-ndó nchàa sá cúú văha ìní Xítohó Jesucrístú, te xíăⁿ cada-ndo.

¹¹ Te vá cãncĥcúⁿ nihnu-ndo tnáhă-ndó càda-ndo datná quidé cuè ñáyiu ndècu ichi cuehé ichi duha, chi nchòhó tàú-ndó cãháⁿ-ndó dôho nchaa ñáyiu ducaⁿ ndècu ichi cuehé ichi duha-áⁿ cuèndá nchaa sá quídě-yu.

¹² Te cucahaⁿ núú-ndó vă càháⁿ-ndó cuèndá ni ìⁿ

sá cuèhé sá dúhá quide dayuhu nchaa ñáyiú-án.

¹³ Dico òré dándixi túu tnúhu Yá Ndiǒxí iní-yu nàcuáa quidé-yu te cùtnuní iní-yu sá ñǎ túú quide váha-yu, te ducaⁿ ndixi cuéchi iní-yu cuendá nchaa sá cuèhé sá dúhá quidé-yu.

¹⁴ Te núú tùtú Yǎ Ndiǒxí càchí-xi:

Nchòhó cúú-ndó dàtná ñáyiú xidí, te vitna ndiquíú iní-ndó,

te cùu tucu-ndo datná ñáyiú ní xíhí, te vitna ndoto-ndo,

te Xítóhó Jesucristú chindee ñàha-gá xii-ndo nàcuáa vá cùndècu-gá-ndó ìchi cuehé ichi duha.

Duha càháⁿ-xi núú tùtú-gá.

¹⁵ Te ío váha cada cuendá-ndó nàcuáa cada-ndo cùndècu-ndo, te vá cáda-ndó dàtná xíquide cue ñáyiú ñá túú tècú tnùní, chi cada-ndo dàtná xíquide ñáyiú ío váha sàá díquí-xi.

¹⁶ Te ñⁿ nduu ñⁿ nduu cani iní-ndó càda-ndo nchaa nacuáa tàú-xi cunduu, chi vitna ío cùnuu nchaa sá cuèhé sá dúhá.

¹⁷ Te cuu-ndo ñáyiú tècú tnùní cuendá ducaⁿ cùtnuní iní-ndó nàcuáa cuíní Yǎ Ndiǒxí cada-ndo, te vá cáda-ndó dàtná xíquide cue ñáyiú ñá túú tnàhí cùtnuní iní-xi nàcuáa cuíní Yǎ Ndiǒxí cáda-yu.

¹⁸ Te vá cúú-ndó ñáyiú quihu chi núu ducaⁿ na càda-ndo te dàcuíta nihnu-ndo mèe-ndo, te dañà-ndo mèe-ndo sá Espíritú Yǎ Ndiǒxí ná tàxi tnùní ñáhá-xi xii-ndo.

¹⁹ Te cáháⁿ-ndó nàcuáa-ni cuáháⁿ ndudú sá ñǎ xóo cata nchaa cue ñáyiú ndéé sanaha ñǎ xóo chiñuhú-yu Yá Ndiǒxí. Te cáháⁿ-ndó nàcuáa cuáháⁿ ndudú sá chíñùhu-ndo Yá Ndiǒxí, te cata-ndo. Te cuèi nchaa dava-gá ndudú ñu-ni ducaⁿ cǎháⁿ-ndó

te cata-ndo. Te ni yùhu ni iní-ndó càta-ndo nchaa ndudú-áⁿ chiñuhu-ndo Yă Ndiöxí.

²⁰ Te vâ dáñá ndèé-ndó ndàcáⁿ táhú-ndó nŭú Tătá-ó Dŭtú Ndiöxí cuèi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndihí-ndo Xítohó Jesucristú.

Tàú-xi sá quìndáá iní tnáhá cuè ñáyiu ndècu ichi Xítohó Jesucristú

²¹ Te nchòhó ñáyiu ndècu ichi Xítohó Jesucristú tàú-xi sá quìndáá iní tnáhá-ndó, te ducaⁿ càda-ndo chi nèhe-ndo sá yíñuhu núú Yă Ndiöxí.

²² Te nchaa nchòhó ñáyiu dìhí ndécú yìi-xi, xìni ñuhu-xi sá quìndáá iní-ndó yìi-ndo datná sàndáá iní-ndó Xítohó Jesucristú.

²³ Chi yìi-ndo tàxi tnuní ñáhá-güedě xii-ndo dàtná quidé Xítohó Jesucristú táxi tnuní ñáhá-gă xii nchoo cuè ñáyiu ndècu ichi-gá. Te diu-gá cúú-gă Yaá ní dácăcu nihnu ñaha xii-o núú ùhú núú ndàhú, te cùu-o datná yiqui cùñú-gá.

²⁴ Te dàtná quidé nchòo ñáyiu ndècu ichi Xítohó Jesucristú sàndáá iní-ó tnìi-o nchaa tnúhu càháⁿ-gá, ducaⁿ tàú-xi cada nchaa nchòhó ñáyiu dìhí quìndáá iní-ndó tnìi-ndo nchaa tnúhu càháⁿ yìi-ndo.

²⁵ Te tnáhá nchaa nchòhó cue téé tucu tàú-xi sá ïo cuu iní-ndó ñàdihí-ndó dàtná quidé Xítohó Jesucristú cúú iní ñáhá-gă xii nchaa nchoo ñáyiu ndècu ichi-gá, chi mee-gă ní xíhí-gá sá cuèndá-ó să cúú iní ñáhá-gă xii-o.

²⁶ Te ducaⁿ ñí quide-gá cuèndá sá ncháá ñáyiu vitna ngúndecu ichi-gá cuu yíñuhú-yu núú Yă Ndiöxí, te ducaⁿ ndàda ndoo ndada nine-gá iní-yu

sá cuendá sá quìndáá iní-yu tnúhu Yá Ndiöxí, te cuanduté-yu.

27 Te ducaⁿ ñi quide-gá cuendá sá ncháá ñáyiú na ngündecu ichi-gá ío váha cundecú-yu núú-gă, te ducaⁿ vă cündecu-gá ni ñⁿ cuéchi-yu núú-gă, te ni ñⁿ-gá sá ñà túú-gă ná cumání-yu núú-gă chi ío cundecu yíñùhú-yu.

28 Te sá dúcáⁿ quide Xítóhó Jesucristú sá cúú-xí cuè ñáyiú ndècu ichi-gá, xíáⁿ tàú-xi sá nchòhó cue téé xíndecu ñadìhí-xi cuu iní-ndó ñadìhí-ndó, te coto-ndö-yu dàtná xító-ndó yiqui cuñú méé-ndó, te cada iní-ndó sá ncháá cuè téé ío cùu iní ñadìhí-xi cùu iní-güedé méé-güedé chi ñⁿ-ná cúú-yu.

29 Te nchoo sà naha-o sá ñi ñⁿ ñáyiú ñá túú dàquee tíhü-yu yiqui cuñú-yu, chi da uuⁿ-gá chíndèé-yu te xító-yu. Te ñi-ni ducaⁿ quide Xítóhó Jesucristú ndihí nchaa ñáyiú ndècu ichi-gá,

30 chi cùu-o datná yiqui cuñú méé-gă, te ducaⁿ chi ñⁿ-ni cùu-o ndihí-gá.

31 Te tnúhu Yá Ndiöxí càchí-xi: “Sá cuendá xíáⁿ nñu nchaa cue téé na ñihí ñadìhí-xi te ñiⁿ-ná cada-güedé tátá-güedé ndihí náná-güedé, te ñadìhí-nă-güedé cuu cuu ndihí-güedé, te ducaⁿ ñⁿ-ná cuu-güedé ndihí-yu”, duha càchí-xi.

32 Te tnúhu-a cùu-xi ñⁿ tnúhu càhnu vihi, te ducaⁿ sá tnàhá-xi cùu Xítóhó Jesucristú ndihí cue ñáyiú ndècu ichi-gá.

33 Te càháⁿ-ni tucu-í dóho nchaa nchòhó cue téé xíndecu ñadìhí-xi sá ío cuu iní-ndó ñadìhí-ndó te coto-ndö-yu dàtná xító-ndó mèe-ndo, te ducaⁿ-ni nchaa nchohó ñáyiú ñihí tucu canehe-ndo sá yíñùhu núú yí-ndo.

6

¹ Te nchaa nchòhó cue landú, quindáá iní-ndó tătă-ndó ndìhi náná-ndó chi ducaⁿ cuìní Yă Ndiǒxí cunduu, te diu ducaⁿ tnàhí tàú-xi cada-ndo.

² Te Yă Ndiǒxí ní cachí-gá sá cánèhe-ndo sá yíñùhu núú tătă-ndó ndìhi núú náná-ndó. Te tnúhu-án cúú-xi tnùhu cùnuu ní cáháⁿ-gá cada cue ñáyiu cuendá cada váha ñaha-gă xií-yu.

³ Te ní cachí-gá sá nũu ducaⁿ na càda-ndo te ío váha cundecu-ndo, te ducaⁿ ío naha cùdíi-ndo cundecu-ndo ñuyíú-a.

⁴ Te nchaa nchòhó cue tée cùu tátá, vá dásátú-ndó iní cue déhe-ndo chi canu ichi-ndo-güèxi nacuáa tàú-xi cunduu, te dacuàha-ndo-güèxi nchaa tnúhu váha nàcuáa cuìní Yă Ndiǒxí cunduu.

⁵ Te nchaa nchòhó cue ñáyiu xínu cuechi, quindáá iní-ndó cuè ñáyiu dii chiuⁿ-xi quide-ndo, te canehe-ndo sã yíñùhu núŷ-yu, te ío váha cuu iní-ndó càda-ndo chiúⁿ-yu, te ducaⁿ nì yuhu nì iní-ndó càda-ndo. Te cada iní-ndó sã dàtná tnúhu sá chiúⁿ Xítóhó Jesucristú quidé-ndó.

⁶ Te dava ñáyiu xínu cuechi, mee-ni òré ndéhé ñáyiu dii chiuⁿ-xi quidé-yu ío ndùcu ndeé-yu quide chiuⁿ váha-yu cuendá cuìní-yu cudíú-yu. Dico nchòhó vá dúcáⁿ càda-ndo, chi cuèi ndècu ñáyiu dii chiuⁿ-xi quide-ndo àdi ñá túŷ-yu dico cada chiuⁿ váha-ni-ndo, te cada iní-ndó sã dàtná tnúhu sá chiúⁿ Xítóhó Jesucristú quidé-ndó, te cada-ndo nì yuhu nì iní-ndó nàcuáa cuìní Yă Ndiǒxí cunduu.

⁷ Te ío váha cuu iní-ndó càda-ndo chiuⁿ-án, chi cada iní-ndó sã dàtná tnúhu sá chiúⁿ Xítóhó Jesucristú quidé-ndó te ñá díú chiuⁿ cue ñáyiu ñuyíú-a.

8 Te nchòhó sá cùtnuní iní-ndó sã nàcuáa ndùu chiuⁿ váha ní guide-ndo ìⁿ ìⁿ-ndo, te ducaⁿ cùnduu sá táxí Xítóhó Jesucrìstú nduu táhú-ndó cuèi cùu-ndo ñáyiu dàñá quée nùú chíúⁿ pàtróóⁿ-xi àdi cuu-ndo ñáyiu ñá túú tnàhí dàñá quee núú chíúⁿ pàtróóⁿ-xi.

9 Te nchaa nchòhó ñáyiu xĩndecu ndìhi ñáyiu xìnu cuechi, tnàhá-ndó tàú-ndó càda váha-ndo sã cúú-xí cuè ñáyiu xìnu cuechi núú-ndó, te vá cùndùu nínu iní-ndó nùú-yu, te chí cuãha cuendá sá díú-ní Xítóhó Jesucrìstú Yaá ndécú àndu taxi tnuní ñáhá-gã xii-ndo ndìhí-yu, te sá cúú-xí mèe-gá chi ìⁿ-ni cùu-ndo núú-gã, te ìⁿ-ni càda ñaha-gã xii-ndo.

Yá Ndiõxí chĩndèe-gá cue ñáyiu ndècu ichi-gá cuendá sá vã ndácú sàcuíhná nàa ndìhi ñaha-xi xii-yu

10 Te vitna nchaa nchòhó ñáyiu ndècu ndìhí-í ichi Xítóhó Jesucrìstú càchí tnúhu-í xii-ndo sã ïo nducu-ndo nàcuáa cada-ndo ñhí ndéé-ndó cùu ìⁿnuu-ndo ndìhi Xítóhó Jesucrìstú, chi mee-gã ïo càhnu cuu-gá, te chindee ñaha-gã xii-ndo.

11 Te ñu-ni nchaa sá ñí nduu táhú-ndó nùú Yã Ndiõxí ñu-ni nchaa xíáⁿ cuhuⁿ iní-ndó, chi xíáⁿ chindee ñaha-xi xii-ndo ñhí ndéé-ndó cùndecu-ndo cuendá sá vã dándàhú ñáhá sàcuíhná xii-ndo.

12 Chi nchoo ñà díú cuè ñáyiu ñuyúú-a nàa ndìhi-o, chi ndìhi cue espíritú cùndìhi yucu ñávãha, te ñu-ni nchaa espíritú-áⁿ cùnùu-xi cuèi núú ñnu quide-xi nchaa sá cuèhé sá dúhá, te ñu-ni-xi cùnùu-xi ñuyúú-a sànu ichi-xi cue ñáyiu quidé-yu nchaa sá cuèhé sá dúhá.

13 Te ïo cuhuⁿ iní-ndó nchaa sá ñí nduu táhú-ndó nùú Yã Ndiõxí cuendá ducaⁿ ñhí ndéé-ndó

cùndecu-ndo, te vá ndácú yùcu ñávãha ná cada ñaha-xi xìi-ndo oré cuíní-xi coto ndeé ñáhá-xí. Te sátá ná dàquee tíhú-ndó yùcu ñávãha te ñíi-ni cunduu-ndo cùndecu-ndo ichi Yá Ndiõxí.

14 Te ducaⁿ cùndecu-ni-ndo ichi Yá Ndiõxí cada-ndo dàtná xíquide cue sandàdú, chi cue téé-áⁿ ïo ñíí xĩndáa-güedé. Te cáháⁿ-ndó mèè-ni tnúhu ndáá tnúhu Yá Ndiõxí, te cuu-ndo dàtná cue sandàdú cue téé ndàda tii xití-xi òré quíhíⁿ-güedé nàá-güedé. Te ducaⁿ sãtnahá-xi cuu-ndo te núu na càháⁿ-ndó mèè-ni tnúhu ndáá tnúhu Yá Ndiõxí. Te cada ndáá-ndó cùndecu-ndo ichi-gá, te cuu-ndo dàtná cue sandàdú cue téé xixíhnu sá yídãhu ñaha xìi-güedé òré nàá-güedé cuèndá sá vã ñicuèhé-güedé. Te ducaⁿ sãtnahá-xi cuu-ndo te núu na càda ndáá-ndó cùndecu-ndo ichi-gá.

15 Te cundecu túha-ndo cãháⁿ-ndó tnúhu Xítóhó Jesucristú, tnúhu sá càháⁿ nãcuáa cuu váha iní ñáyiu cundecú-yu, te cuu-ndo dàtná cue sandàdú cue téé ndíhu zapàtú-xi quíhíⁿ-güedé nàá-güedé. Te ducaⁿ sãtnahá-xi cuu-ndo te núu na cùndecu túha-ndo cãháⁿ-ndó tnúhu Xítóhó Jesucristú núú ñáyiu.

16 Te càchí tnúhu tucu-í xii-ndo sã ïo quĩndáá iní-ndó Yã Ndiõxí cuèndá sá vã ndácú sàcuíhná ñã cada ñaha-xi xìi-ndo, te ducaⁿ te cuu-ndo dàtná cue sandàdú cue téé xĩnehe vítú chínèè-güedé sáquĩdáhu ñaha-xi xìi-güedé cuèndá sá vã cuicúⁿ-güedé sá nchìcúⁿ ñuhú téé ñaha cue téé nàá ndíhí-güedé. Te ducaⁿ sãtnahá-xi cuu-ndo te núu na quĩndáá iní-ndó Yã Ndiõxí.

17 Te ío cuhuⁿ iní-ndó sã ñí naníhí tàhú-ndó, te cuu-ndo dàtná cue sandàdú cue téé ñùhu mbelú cáxíⁿ. Te ducaⁿ sãtnahá-xi cuu-ndo te núu

na cùhuⁿ iní-ndó sǎ nǐ naníhí tàhú-ndó. Te ío cuhuⁿ iní-ndó tnùhu Yá Ndiöxí, chi tnúhu-áⁿ nǐ taxi Espíritú-gá ndécú ndìhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machítí cuáháⁿ-güedé nàá-güedé. Te ducaⁿ sǎtnahá-xi cuu-ndo te núu na cùhuⁿ iní-ndó tnùhu Yá Ndiöxí.

18 Te vá dáñá ndèè-ndó cǎháⁿ ndìhi-ndo Yá Ndiöxí nàcuáa chindee ñaha Espíritú-gá xii-ndo, te cǎcáⁿ táhú-ndó nǔú-gǎ nǔu ná cuíní-ndó, te ío cundecu túha-ndo cǎháⁿ ndìhi-ndo-gǎ, te vá nátùhú iní-ndó cǎcáⁿ táhú-ndó nǔú-gǎ cuendá nchaa dava-gá cue ñǎyiu cùu cuendá-gá.

19 Te tnàhá cuendá-í cǎcáⁿ táhú-ndó nǔú Yá Ndiöxí cuendá sá ná chindee ñaha-gá xii-í nǐhì-í tnúhu cǎháⁿ-í òré cǎháⁿ-í tnúhu-gá, te ducaⁿ vǎ yùhú-í cǎháⁿ-í nàcuáa ndùu tnúhu sá cǎháⁿ nàcuáa naníhí tàhú-ó nǔú ñǎyiu tnúhu sá vǎtá cùndèdóho-gá-yu.

20 Te Yá Ndiöxí ní cachí-gá sá yùhú cuu-í ìⁿ téé cada-í núú-gǎ cǎháⁿ-í tnúhu-gá núú ñǎyiu, te diu cuendá tnúhu-áⁿ yíhì-í vecaá vitna. Te ío cǎcáⁿ táhú-ndó nǔú Yá Ndiöxí cuendá-í cuendá sá yùhú cuyì-í nǐ yùhu nǐ iní-í cǎháⁿ-í tnúhu-gá núú ñǎyiu nàcuáa tàú-xi cunduu.

Tnúhu ndéé núú nǐ ndìhi-ná

21 Te té Tìquicú téé ío cùu iní-í ndécú ndìhi-o ichi Xítóhó Jesucrìstú cúú-dě ìⁿ téé ío váha quìde ndáá xínú cuèchi-dé núú Xítóhó Jesucrìstú, téé-áⁿ cachí tnúhu-dé xii-ndo nàcuáa cùu ndecu-í ndìhi nchaa nàcuáa quìde-í cuendá ducaⁿ cùtnuní iní-ndó.

22 Te cuendá xǎⁿ nǔu cuíní-í tendaha-í-dé quixi-dé núú ndécú-ndó cuendá cachí tnúhu-dé

xii-ndo nchàa nacuáa cùu ndecu-ndí iha, te ducaⁿ tàxi-gá-dé tnúhu ndee ìní cundecu ndihì-ndo.

²³ Te xìcáⁿ táhù-í núú Tătá-ó Dűtú Ndiöxí ndihì núú Xĩtohó Jesucrìstú sá ncháá nchòhó ñáyiú ndècu ndihì-í ichi-gá sá d̄iù-gá ná cádá te ío váha cuu iní-ndó cùndecu-ndo, te ducaⁿ ïo cuu iní tnáhá-ndó, te ío quindáá iní-ndó-gă.

²⁴ Te nchòhó ío cùu iní-ndó Xĩtohó Jesucrìstú, te ñá túú dàña ndeé-ndó cùu iní-ndó-gă. Te mee Yă Ndiöxí ío na ch̄indee chitúu ñaha-gă xii-ndo. Te ducaⁿ na cùnduu. Te ío chí cádá ndèe iní-nă vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

872f7754-0986-5ecd-a059-925a708a6939